

# Program Pembangunan PKS dan Keusahawanan pada Tahun 2016

**P**rogram pembangunan PKS terus diperkukuhkan dalam Rancangan Malaysia Kesebelas (RMKe-11), 2016-2020, sejajar dengan objektif Pelan Induk PKS ke arah mencapai negara berpendapatan tinggi menjelang tahun 2020. Tumpuan telah diberikan dalam mempertingkatkan produktiviti, inovasi, keusahawanan dan keterangkuman. Selain program untuk meningkatkan pertumbuhan ekonomi, program baharu bagi kumpulan 40% terendah dalam piramid pendapatan yang merangkumi sebahagian besar usahawan mikro yang bekerja sendiri juga dilaksanakan bagi meningkatkan pendapatan dan taraf kehidupan mereka. Ini adalah untuk memastikan negara melangkah ke arah negara maju dan inklusif dalam erti kata yang sebenar. Kerajaan akan terus memantau dan mengukur keberkesanan dan impak program melalui pendekatan berasaskan keberhasilan.

Program serta inisiatif untuk PKS ini bertujuan untuk meningkatkan **produktiviti** melalui automasi dan pembangunan modal insan, ini termasuklah mengubah Latihan dan Pendidikan Teknikal Vokasional (*Technical Vocational Education and Training, TVET*) menjadi relevan kepada industri; memperhebatkan inovasi dan pengkomersialan melalui kerjasama ahli akademik dan industri; pengantarabangsaan dan mewujudkan jaguh tempatan; meningkatkan kaedah pembiayaan alternatif dalam membantu aktiviti ekonomi baharu; memudahkan urusan menjalankan perniagaan serta inisiatif khusus untuk Sabah dan Sarawak terutamanya dalam meningkatkan infrastruktur dan perhubungan. Sejak beberapa tahun lepas, program ini merentasi lima bidang tumpuan utama iaitu akses kepada pasaran, pembangunan modal insan, akses kepada pembiayaan, penerapan teknologi dan inovasi, serta infrastruktur.

Bagi tahun 2016, dengan peruntukan sebanyak RM4.3 bilion, Kerajaan sedang melaksanakan 125 program yang dijangka memberi manfaat kepada 453,945 PKS. Akses kepada pembiayaan merupakan majoriti program yang dilaksanakan (24.8%) dan mempunyai jumlah peruntukan pembiayaan tertinggi iaitu RM3.8 bilion. Maklumat lanjut berhubung program Akses Kepada Pembiayaan ini diperincikan dalam Bab 6. Manakala program selebihnya, kira-kira satu perempat dikhususkan untuk pembangunan modal insan (24.8%) dan akses pasaran (24%), diikuti oleh penerapan teknologi dan inovasi (16%) dan infrastruktur (10.4%). Secara keseluruhannya, terdapat 27 program lain dengan peruntukan tambahan berjumlah RM2.9 bilion sedang dilaksanakan dengan kerjasama sektor swasta, sekali gus menjadikan jumlah keseluruhan program adalah berjumlah 152 program dan peruntukan RM7.3 bilion bagi tahun 2016.

**Jadual 5.1** : Program Pembangunan PKS bagi tahun 2016 mengikut Bidang Tumpuan

Bidang Tumpuan Utama	Bilangan Program	Peruntukan Kewangan (RM juta)	Bakal Penerima Manfaat
Akses kepada Pembiayaan	31	3,843.0	417,416
Pembangunan Modal Insan	31	83.1	21,800
Akses kepada Pasaran	30	107.1	7,175
Penerapan Teknologi & Inovasi	20	208.1	7,004
Infrastruktur	13	112.0	550
<b>JUMLAH</b>	<b>125</b>	<b>4,353.3</b>	<b>453,945</b>

Sumber: Pelan Tindakan Bersepadu PKS (SME Integrated Plan of Action, SMEIPA) 2016, SME Corp. Malaysia

**Carta 5.1:**  
Bil. Program mengikut Bidang Tumpuan, %



- 24.8 ■ Pembangunan Modal Insan
- 24.8 ■ Akses kepada Pembiayaan
- 24.0 ■ Akses kepada Pasaran
- 16.0 ■ Penerapan Teknologi & Inovasi
- 10.4 ■ Infrastruktur

**Carta 5.2:**  
Peruntukan Kewangan mengikut Bidang Tumpuan, %



- 88.3 ■ Akses kepada Pembiayaan
- 4.8 ■ Penerapan Teknologi & Inovasi
- 2.6 ■ Infrastruktur
- 2.4 ■ Akses kepada Pasaran
- 1.9 ■ Pembangunan Modal Insan

**Carta 5.3:**  
Bakal Penerima Manfaat mengikut Bidang Tumpuan, %



- 92.0 ■ Akses kepada Pembiayaan
- 4.8 ■ Pembangunan Modal Insan
- 1.6 ■ Akses kepada Pasaran
- 1.5 ■ Penerapan Teknologi & Inovasi
- 0.1 ■ Infrastruktur

## PEMBANGUNAN MODAL INSAN

Cabaran yang tiada kesudahan bagi kebanyakan PKS adalah kekurangan pekerja yang berpengetahuan, berkemahiran dan berkemampuan. Tenaga kerja yang mantap dan efisien adalah penting dalam menyumbang kepada pertumbuhan syarikat. Selain itu, usahawan perlu mempunyai visi yang jelas, kebijaksanaan, dan kemahiran untuk memupuk dan memberi motivasi kepada pekerja di samping mengembangkan perniagaan mereka. Oleh itu, program di bawah bidang tumpuan ini mensasarkan usahawan dan pekerja bagi mengukuhkan keupayaan modal insan yang boleh menerajui dan mendorong mereka ke arah menjana pertumbuhan perniagaan yang tinggi dan menjadi komuniti perniagaan PKS yang berjaya di negara ini. Keseluruhannya, terdapat 31 program yang dijangka memberi manfaat kepada 21,800 PKS. Program-program ini telah diberi peruntukan sebanyak RM83.1 juta dan ini termasuklah program dari Kementerian Sumber Manusia (KSM):

- **Sistem Latihan Dual Nasional (*National Dual Training System, NDTs*)** dengan bajet sebanyak RM37.5 juta yang dilaksanakan oleh Jabatan Pembangunan Kemahiran (JPK). NDTs dijangka mendaftar 4,000 pelatih yang terdiri daripada lepasan sekolah dan penganggur dalam sesi latihannya dalam menyokong permintaan tenaga kerja oleh PKS. Program ini juga menyediakan latihan peningkatan kemahiran untuk pekerja syarikat PKS sedia ada dan baharu dan dijangka melatih 2,000 pekerja; dan
- **SME Capability Programme** yang dilaksanakan oleh Pembangunan Sumber Manusia Berhad (PSMB) dengan peruntukan sebanyak RM15 juta. Program ini adalah bagi meningkatkan kemampuan 3,000 PKS yang merupakan pemilik perniagaan serta pembuat keputusan dalam strategi perniagaan, inovasi dan pembangunan produktiviti.



- Jabatan Perdana Menteri (JPM) melalui Institut Keusahawanan Negara (INSKEN) yang kini di bawah Unit Peneraju Agenda Bumiputera (TERAJU) melaksanakan program Bumiputera berikut:
  - **Program INSKEN500 | SCALEUP** menyediakan kemahiran keusahawanan dan pengetahuan yang komprehensif dalam membentuk perniagaan yang mampan melalui kaunseling perniagaan, latihan, perundingan dan fasilitasi perniagaan. Sejumlah RM6.6 juta telah diperuntukkan untuk membangunkan 500 syarikat; dan

- **Program Awam INSKEN** bagi perkongsian pengetahuan dan pengalaman dalam kalangan pengamal industri. Program ini mempunyai peruntukan berjumlah RM3.9 juta untuk 3,000 peserta.
- Program-program berikut sedang dikendalikan oleh Jabatan Pembangunan Wanita (JPW) di bawah Kementerian Pembangunan Wanita, Keluarga dan Masyarakat (KPWKM):
  - **Inkubator Kemahiran Ibu Tunggal (I-KIT)** mempunyai peruntukan berjumlah RM750,000 bagi menyediakan latihan kemahiran intensif dan bantuan keusahawanan untuk ibu tunggal yang berpendapatan rendah untuk membolehkan mereka memulakan perniagaan sendiri. Program ini dijangka disertai oleh 290 peserta dalam 15 sesi latihan dalam bidang jahitan, terapi kecantikan, masakan komersial, kraf, penjaagaan kanak-kanak dan pelancongan; dan
  - **Inkubator Keusahawanan Wanita (I-KeuNITA)** menyediakan latihan kemahiran intensif dan bantuan keusahawanan kepada wanita berpendapatan rendah untuk membolehkan mereka memulakan perniagaan sendiri. Dengan bajet berjumlah RM750,000, program ini bertujuan meningkatkan pendapatan 90 peserta wanita sebanyak 50%.

## AKSES KEPADA PASARAN

Perjanjian Perkongsian Tran-Pasifik (*Trans-Pacific Partnership Agreement*, TPPA) dan Komuniti Ekonomi ASEAN (*ASEAN Economic Community*, AEC) akan mewujudkan lebih banyak peluang kepada PKS untuk meneroka dan meluaskan pasaran produk serta pekhidmatan mereka. Program di bawah bidang tumpuan ini bertujuan untuk membantu PKS mengakses pasaran tempatan dan luar negara yang lebih luas melalui inisiatif promosi serta meningkatkan prospek pasaran eksport PKS melalui bantuan sokongan. Sejumlah RM107.1 juta telah diperuntukkan untuk 30 program di bawah akses kepada pasaran yang dijangka memberi manfaat kepada 7,175 PKS.

- Perbadanan Pembangunan Perdagangan Luar Malaysia (MATRADE) akan melaksanakan program-program berikut di bawah Kementerian Perdagangan Antarabangsa dan Industri (MITI):
  - **Program Going Export (GoEx)** yang diperkenalkan sebagai salah satu Program Berimpak Tinggi di bawah Pelan Induk PKS dengan peruntukan sebanyak RM7.7 juta bagi mengenalpasti, memupuk dan membangunkan 125 PKS pada tahun 2016 agar menjadi lebih berdaya saing dalam arena antarabangsa;

- o Dengan bajet sebanyak RM20 juta, **Geran Pembangunan Pasaran (Market Development Grant, MDG)** akan menyediakan bantuan kepada 1,500 PKS, Persatuan Perdagangan dan Industri, Dewan Perniagaan dan Badan Profesional untuk menjalankan aktiviti bagi pembangunan pasaran eksport; dan
- o Melalui **Program eTrade** yang dilaksanakan oleh MATRADE menyediakan bantuan kepada PKS untuk meningkatkan eksport melalui penyertaan dalam pasaran elektronik utama antarabangsa. Program ini dijangka memberi manfaat kepada 1,000 PKS dan menjana jualan sebanyak RM10 juta.
- Selain itu, MITI akan memantau program berikut:
  - o Program **Galakan Eksport Bumiputera (GEB)** yang menyediakan bantuan bersepadu kepada PKS Bumiputera yang layak untuk penerokaan pasaran eksport. SME Corp. Malaysia akan melaksanakan program ini dengan peruntukan sebanyak RM30 juta bagi membangunkan 15 PKS Bumiputera; dan
  - o Program **Strategies to Enhance Export of Automotive Parts and Components** mempunyai bajet sebanyak RM2.9 juta yang akan dilaksanakan oleh Institut Automotive Malaysia (MAI). 60 peserta dijangka menyertai program ini bagi membangunkan vendor komponen automotif tempatan yang berpotensi mengeksport produk mereka dengan jumlah eksport tahunan dijangka akan meningkat kepada RM522 juta.

Terakhir, Kementerian Pelancongan dan Kebudayaan Malaysia (MOTAC) dijangka dapat mempertingkatkan jualan kraf sebanyak 10% dalam pasaran antarabangsa dan tempatan dengan nilai jualan sebanyak RM500 juta. Ini akan dicapai melalui **Program Pembangunan Industri Kraf** yang mempunyai bajet berjumlah RM2 juta yang kendalikan oleh Perbadanan Pembangunan Kraftangan Malaysia (Kraftangan Malaysia).

## PENERAPAN TEKNOLOGI DAN INOVASI

Bagi meningkatkan kualiti produk dan perkhidmatan serta memupuk reputasi perniagaan yang kukuh, PKS harus seiring dengan teknologi terkini. Inovasi juga turut menjadi semakin penting dalam membantu syarikat untuk lebih menyerlah dalam persaingan serta meningkatkan piawaian operasi. Ianya dapat membantu meningkatkan prospek pertumbuhan serta peluang perniagaan. Kerajaan telah memperuntukan sejumlah RM208.1 juta bagi 20 program yang bertujuan membantu PKS dalam meneroka penerapan teknologi dan inovasi.



Dengan sasaran 7,004 penerima manfaat, berikut merupakan program penerapan teknologi dan inovasi yang dikendalikan oleh MITI:

- o **Program Peningkatan Perusahaan Bumiputera (BEEP)** dilaksanakan oleh SME Corp. Malaysia yang menyediakan pakej bantuan komprehensif kepada PKS Bumiputera. Program ini mempunyai bajet berjumlah RM10 juta dan dijangka akan memberi manfaat kepada 80 PKS; dan
- o **Teknologi Pintar MAI** oleh MAI bertujuan untuk membangunkan vendor tempatan sedia ada serta pusat perkhidmatan kenderaan kepada tahap 4. Dengan peruntukan sebanyak RM4.4 juta, program ini dijangka akan melibatkan 180 vendor dan 500 bengkel.
- Kementerian Sains, Teknologi dan Inovasi (MOSTI) menguruskan **Dana Pra-Pengkomersialan** bagi membantu PKS membangunkan proses, teknologi, termasuk produk baharu serta penambahbaikan kepada proses dan teknologi sedia untuk dikomersialkan. Sejumlah RM40 juta telah diperuntukkan bagi program ini dengan jangkaan penghasilan 20 projek yang berpotensi untuk tujuan pengkomersialan.
- Selain itu, MOSTI melaksanakan program berikut melalui Perbadanan Pembangunan Teknologi Malaysia (MTDC):
  - o **Dana Pengkomersialan Penyelidikan dan Pembangunan (Commercialisation of R&D Fund, CRDF)** memanfaatkan Sains, Teknologi dan Inovasi bagi pembangunan nasional dan menjana kekayaan melalui pengkomersialan produk dan proses. Dengan komitmen pembiayaan berjumlah RM40 juta, ianya dijangka akan menghasilkan lima produk atau perkhidmatan ke pasaran luar negara; dan
  - o **Dana Perolehan Teknologi (Technology Acquisition Fund, TAF)** telah memperuntukan sejumlah RM20 juta bagi mempromosikan penggunaan teknologi luar dalam sektor pembuatan dan pembangunan fizikal produk serta proses sedia ada dan baharu ke arah penjanaan kekayaan di samping meningkatkan penggunaan teknologi oleh syarikat Malaysia. Sebanyak tiga syarikat dijangka akan mendapat kelulusan bagi geran ini.
- Sejumlah RM25.5 juta telah diperuntukkan kepada **Program Bumiputera ICT Demand Aggregation (BiDA) 2.0**, diuruskan oleh Perbadanan Ekonomi Digital Malaysia (MDEC) di bawah Kementerian Komunikasi dan Multimedia Malaysia (KKMM). Program ini bertujuan untuk mewujudkan dan mengenalpasti peluang perniagaan bagi teknousahawan Bumiputera dan syarikat ICT yang berkeelayakan berdasarkan keperluan pasaran ke arah mewujudkan kumpulan syarikat yang mematuhi kehendak pasaran.

- **Demand-Driven Innovation Project oleh Jaringan Penyelidikan Awam Swasta (Public-Private Research Network, PPRN)** adalah inisiatif yang dipelopori oleh Kementerian Pendidikan Tinggi (KPT) bertujuan mewujudkan ekosistem yang mesra pengetahuan melalui ilmu yang dihasilkan dan disebarkan oleh mereka yang memiliki kepada yang memerlukan. PPRN akan memanfaatkan serta mengoptimalkan kepakaran yang ada di Institut Pengajian Tinggi dan lain-lain Institut Penyelidikan di Malaysia dalam menyediakan penyelesaian secara saintifik dan berteknologi bagi masalah yang dihadapi oleh industri dan PKS. PPRN menyediakan geran bersamaan sehingga RM50,000 bagi setiap projek. Untuk 2016, PPRN mensasarkan 300 projek yang berjaya dipadankan.



## INFRASTRUKTUR

Program pembangunan infrastruktur oleh Kerajaan bertujuan untuk membantu pembangunan ekonomi diseluruh negara dengan menyediakan perniagaan PKS untuk beroperasi dalam persekitaran yang kondusif, kemudahan yang lengkap dan berada di kawasan yang mempunyai potensi komersial yang kukuh. Selain itu, program ini bertujuan untuk menggalakkan keusahawanan dalam komuniti tempatan dengan menawarkan peluang untuk meningkatkan pendapatan dan taraf hidup mereka. Untuk itu, Kerajaan telah memperuntukan sejumlah RM112 juta bagi 13 program yang dijangka memberi manfaat kepada 550 PKS.

- Program berikut akan dilaksanakan oleh Kementerian Kewangan (MOF):
  - **Pembangunan Premis Perniagaan** oleh Perbadanan Kemajuan Negeri Sabah (SEDCO) akan memberi tumpuan kepada empat projek; Taman Industri PKS SEDCO, Bazar Masjid Negeri Kota Kinabalu, Premis Industri Sandakan dan Lot Kedai di Sook, Keningau. Dengan komitmen pembiayaan berjumlah RM4.6 juta, program ini dijangka akan membangunkan 94 unit bagi empat premis yang digabungkan;





- o **Pembangunan Kilang dan Lot Kedai PKS** di Kelantan oleh Perbadanan Kemajuan Ikhtisad Negeri Kelantan (PKINK) akan menyediakan kilang pembuatan dan premis perdagangan runcit yang kondusif kepada PKS bagi mengembangkan perniagaan mereka melalui pembinaan kilang PKS di Pengkalan Chepa dan lot kedai di Jeli. Program ini telah diperuntukkan sejumlah RM4 juta untuk membangunkan 22 unit secara keseluruhannya di kedua-dua premis; dan
- o **Menaik taraf Premis Perniagaan** di Kelantan yang merangkumi dua projek: Naik taraf Pasar Basah di Berek 12 Kota Bharu untuk menyediakan premis perdagangan runcit yang kondusif kepada usahawan mikro dan naik taraf pemecah air di Medan Ikan Bakar untuk melindungi premis sedia ada yang menempatkan 37 rumah usahawan. Dengan bajet berjumlah RM8.9 juta, projek yang pertama dijangka 58% siap, manakala yang kedua dijangka siap sepenuhnya menjelang akhir tahun 2016.

- Selain MOF, Kementerian dan agensi lain juga akan terbabit dalam program untuk membangunkan infrastruktur termasuk Kerajaan Negeri Sabah. Melalui Perbadanan Kemajuan Ekonomi Negeri Sabah (SEDCO), Kerajaan Sabah akan membina rumah kedai untuk usahawan beroperasi dan memulakan perniagaan di bawah **Program Rumah Kedai di Sindumin, Sabah**. Sejumlah RM2.8 juta telah diperuntukkan bagi program ini dengan sasaran bagi membina 12 unit rumah kedai.
- Selain itu, Jabatan Kemajuan Orang Asli Malaysia (JAKOA) telah menerima peruntukan berjumlah RM1.8 juta daripada Kementerian Kemajuan Luar Bandar dan Wilayah (KKLW) untuk **Membina Premis Perniagaan**. Program ini dijangka akan menyediakan premis perniagaan kepada 32 usahawan Orang Asli serta menyediakan bantuan jentera, perabot, bot dan barangan lain kepada 16 usahawan Orang Asli mengikut keperluan mereka.
- Di bawah **Program Pembangunan Hartanah Industri**, Kementerian Pembangunan Perindustrian & Keusahawanan, Perdagangan dan Pelaburan Sarawak (MIETI Sarawak) akan membangunkan Kawasan Perindustrian Sibul. Projek ini menyediakan infrastruktur yang tersusun bagi pembangunan kawasan perindustrian serta memberi persekitaran yang lebih kondusif untuk komuniti perniagaan tempatan khususnya PKS. Bagi 2016, bajet berjumlah RM30 juta diperuntukkan bagi program ini.

